

河朔訪古記

河朔訪古記

欽定四庫全書總目

河朔訪古記二卷

不著撰人名氏明焦竑國史經籍志著錄亦不云誰作考元劉仁本羽庭集有是書序曰今翰林國

史院編修官郭囉洛氏納新

案郭囉洛原作葛邏祿納新原作迺賢今

改正易之自其先世徙居鄆至正五年挈行李出浙

渡淮溯大河而濟歷齊魯陳蔡晉魏燕趙之墟弔古山川城郭邱陵宮室王霸人物衣冠文獻陳迹故事暨近代金宋戰爭疆場更變者或得於圖經

河朔訪古記

提要

一

地志或聞諸故老舊家流風遺俗一皆考訂夜還旅邸筆之於書又以其感觸興懷慷慨激烈成詩歌者繼之總而名曰河朔訪古記凡一十六卷云云則此書實爲納新作焦氏考之未審序稱十六卷焦氏作十二卷亦誤也納新族出西北郭囉洛因以爲氏郭囉洛者以

欽定西域圖志考之卽今塔爾巴哈台也元時色目諸人散處天下故納新寓居南陽後移於鄆縣初辟爲浙東東湖書院山長以薦授翰林編修官出參

桑哉實哩

原作桑前失
里今改正

軍事卒於軍所著金臺集

尙有刊本惟此書久軼今散見永樂大典中者惟一百三十四條所紀皆在真定河南境內而其餘不存又仁本所稱繼以詩歌者亦不復可見然據今所存諸條其山川古迹多向來地志所未詳而金石遺文言之尤悉皆可以爲考證之助謹彙而編之核其道里疆界各以類從真定路爲一卷河南路爲一卷仍錄劉仁本原序冠之雖殘闕之餘十存一二而崖略宛在條理可尋講輿地之學者

河朔方古記

提要

二

猶可多所取資焉

河朔訪古記卷上



元

納

新

撰

常山郡部

常山郡部真定路禹貢冀州之域春秋鮮虞之地晉滅之戰國屬趙秦爲鉅鹿郡地漢初置恆山郡避文帝名改常山郡屬真定國晉仍爲常山郡魏因之徙今治後周立恆州隋復爲恆山郡唐初曰恆州天寶改常山郡又改平山郡尋復常山元和避穆宗諱改鎮州升成德軍五代梁曰武順軍晉曰順德軍漢曰成德軍周及宋

河朔訪古記

卷上

一

皆因之宋尋改真定府爲河北重鎮金因之置河北西路國朝初仍爲河北西路懷衛邢洺磁相保大名河間皆隸焉後改真定路總管府領縣九曰真定曰欒城元氏靈壽獲鹿平山阜平藁城涉縣領府一曰中山領州五曰冀深蠡晉趙府州所鎮縣凡二十有一真定路錄事司國朝所建立事理城內城之外則真定縣所理城中今置燕南河北道肅政廉訪使及真定路總管府以鎮之錄事司真定縣二官署皆在城中

漢高祖攻陳豨改曰真定魏爲常山郡治故城今在縣

南元魏移郡治于府城中隋廢郡唐復爲眞定縣屬鎮
州宋金因之屬眞定府國朝爲眞定路倚郭縣

藁城縣戰國趙武靈王爲九門縣漢爲藁城屬眞定九
門屬常山晉省藁城北齊置鉅鹿郡省九門唐置廉州
復改藁城州尋廢又置九門縣曰觀州州亦廢並屬鎮
州天祐置藁平縣宋置藁城省九門入焉開寶三年廢
金復置國朝因之屬眞定路

欒城縣春秋晉靖公孫賓食邑賓因以欒爲氏西漢爲
關縣卽今治也東漢爲欒城縣故城在趙州西北十六

河朔訪古記

卷上

二

里今日輪城是也晉省後魏復置隋置欒州尋廢唐改
欒氏屬趙州後屬眞定宋爲欒城金因之國朝爲眞定
路屬縣

中山府城古中山唐堯始封此禹貢爲冀州之域春秋
鮮虞國也初爲中山魏并之秦爲上谷鉅鹿二郡地漢
置中山國治盧奴後燕慕容垂都此北魏爲中山郡隋
爲博陵郡尋改高陽唐爲定州又復改博陵郡升義武
軍宋改定武軍升中山府中山郡金仍爲中山府國朝
因之爲中山府隸眞定路領縣三曰安喜爲附郭縣曰

新樂曰無極

安喜縣春秋鮮虞之地戰國爲中山魏文侯使樂羊取之以封太子至漢爲盧奴苦陘二縣之地東漢爲漢昌縣魏改魏昌元魏立安州尋改定州北齊遷安喜于今治隋廢安喜屬博陵郡尋置鮮虞縣唐復爲安喜宋金因之國朝以安喜爲中山府倚郭縣兼理城中

趙州城中禹貢冀州之域春秋屬晉戰國屬趙秦屬邯鄲郡漢屬恆山鉅鹿二郡地晉爲趙國北魏趙郡兼置殷州理象城北齊爲趙州隋改欒州尋爲趙郡唐復爲

河朔訪古記

卷上

三

欒州尋改趙州又爲趙郡屬河北道宋初仍爲趙州崇甯中升慶源軍尋升慶源府金天德三年改沃州因與趙音同又取以水沃火之義云國朝復爲趙州隸真定路領縣七曰平棘爲附郭縣曰甯晉曰臨城曰高邑曰柏鄉曰隆平曰贊皇

平棘縣漢初屬常山郡後置宋子縣晉屬趙國後魏爲趙郡治所復置宋子縣隋自象城移趙州治此改置平棘縣唐宋金皆因之國朝爲趙州屬縣倚郭縣兼理城

中

管仲曰鄙邑之黍春秋納荀卿于栢人鄙爲晉邑栢鄉卽栢人今治卽鄙邑也漢屬鉅鹿郡高祖八年次栢人趙相貫高謀殺上上心動問縣名栢人上曰栢人者追于人也去弗宿卽此地也光武卽位于縣之五成陌千秋亭更名高邑爲冀州刺史治所魏改陌仁隋置栢鄉縣于彭水之陰卽今治也唐因之屬趙州天寶改堯山縣宋省栢鄉入高邑而存堯山金復爲栢鄉屬沃州國朝因之爲趙州屬縣云

元氏縣西北三十餘里曰封龍山星文圖曰山應軒轅河朔訪古記

卷上

四

十星屈折若飛龍之狀故云山陽有龍首峯高二百丈上有立石數莖望之若龍骨也峯東北五里又有獅子峯高五百丈若獅子蹲踞又有熊耳峯高五百丈又有玉石峯螺峯南北天井皆西北最高之峯各以其形相類而名也又有石人峯在東南隅三石相向屹立各高三四丈儼如人形又有孩兒華蓋二峯名仙人臺則在螺峯之西怪石相承如臺故云山絕頂有二塔獅子峯後數百步有白雲洞世傳張果老所居又有龍井而水簾在龍泉之上垂二丈許雖祁寒不凍大旱禱輒應云

十萬壘趙州平棘縣南五里安濟橋南有壁壘曰十萬
今俗呼爲西壁營昔漢安帝永初元年以鄧騭任尙討
羌無功而還後羌遂侵河內趙魏民驚恐北軍中候宋
寵將五營兵屯孟津詔魏郡趙國常山中山繕作塢壘
六百十有六所此卽一也今河羌人居之

罽毘山

音權
髦

在栢鄉縣南乃土山也今屬順德路唐山

縣境卽古栢人也罽毘山出五色石

眞一泉眞定路府治西街居民舍下有一井極甘美曰

眞一泉金章宗嘗取惠山泉與此水較之其味大勝章

河朔訪古記

卷上

五

宗因曰眞一潤二遂以名其泉云

盧水中山府城濠水流入城中爲盧水水經注曰盧奴
城西北隅有水困而不流南北一百步東西百有餘步
水黑色俗名黑水池或曰黑水曰盧不流曰奴故曰盧
奴云自原本缺
一字至燕皆引滹水入城今水竇旣毀地道
亦絕惟池水流出城外潭積微漲滑滑東北流注于滹
水也

涇邑縣故城安喜東南五十里本趙之涇城也史記曰
田叔趙涇城人也漢爲苦涇縣屬中山國章帝改漢昌

魏改魏昌北齊廢隋置隋昌屬博陵郡唐改唐昌屬定州天寶間改陘邑至宋康初省入安喜迄今爲墟市民居甚眾豪商大賈皆集焉市衢之西有西門豹之廟此卽史記所謂陳餘游苦陘得富人公乘氏女所也

新城在縣北三十里曰新城鎮卽古新市縣也爲白狄鮮虞之國漢爲中山屬縣王莽曰平樂縣也趙記曰新市縣有藺相如廉頗李牧三將之宅故其城勢作成三曲西北避相如宅東北避頗宅東南避牧宅又云相如祖塋皆在城中今爲新市鄉新城鎮居民數百家爲墟

河朔訪古記

卷上

六

市十二月夜宿鎮上蘇氏逆旅是夜大雪

九門故城

董氏
族附

藁城縣西北三十里荒城一區蓋戰國

時趙邑本有九室居之武靈王改曰九門史記王出九門如野臺以望齊中山之境是也惠文王二十八年藺相如城之漢爲縣今爲九門鎮野臺在城側俗呼爲寒臺云城中世家惟董氏一族故自其龍虎衛上將軍俊帥孤軍內附滅金之役戰死黃河之上諡忠烈其子文炳忠獻公受知世祖身兼左轄僉樞之職討滅宋國事載信史次文用爲翰林承旨諡忠穆次文忠僉樞密院

諡忠貞其孫士選陝西平章諡忠宣子孫清顯世罕及之者內翰元文敏公明善撰公家傳贊曰或曰爲將三世其後受其不祥董氏貴顯四世子孫數千百人或曰活一人者必有後龍虎公忠顯公爲大將不妄殺濱死而生之者無慮數十萬人其諸以是爲德與後臺臣上章累請援史張功臣例進封王爵子孫辭不受蓋以滿盈爲誠也余嘗過其第中見其冠蓋蟬聯子孫皆清修好學而有承平公子之風觀乎此清河元公之言益信

南樂故城

千金渠附

相鄉縣南千山言山二山之西也俗呼

河朔訪古記

卷上

七

爲南陵城十三州志曰昔陳公子完避亂奔齊桓公以此封之漢武帝封趙敬肅王子它爲南樂侯卽王莽之富平也左氏傳曰齊國夏伐晉取欒其後南徙故曰南樂云城西有千金渠唐開元中縣令王佐所浚以疏積潦其堰則謂之萬金堰也

眞定路之南門曰陽和其門頗完固上建樓櫓以爲眞定帑藏之巨盈庫也上作雙門而無棖臬通過而已左右挾二瓦市優肆娼門酒鑪茶竈豪商大賈並集於此大抵眞定極爲繁麗者蓋國朝與宋約同滅金蔡城旣

破遂以土地歸宋人民則國朝盡遷于此故汴梁鄭州之人多居真定于是有故都之遺風焉

藁城縣西二十五里故城東高臺三所圯址尙存郭况故臺也今臺傍有三村落一曰臺西一曰故城一曰內族此卽郭后所居也昔光武擊王郎至真定過此因納郭氏爲后今臺三所作南西北三面北臺之上建盧郎神廟不知何神廟東向神像具唐服民至今祀之今真定平山縣東有綿蔓故城卽光武所封况之侯國也

安喜縣東南三十里荒臺一所曰雞鳴臺世傳漢世祖

河朔訪古記

卷上

八

自薊而南于此舍宿其地窪下遂築此臺雞鳴而發因以名云

趙州城中州衙南皇華驛之東有望漢臺此卽東漢耿純所築以望東武之所也歲久摧圯宋大觀四年知軍州事劉戒惜其遺跡湮沒乃築而新之其高七尋其基延袤二百八十尺上廣六十尺仍構屋以覆之命州判官趙徽之撰望漢臺銘刻石其碑今在州衙前金刺史趙溫諤碑樓下望漢臺但一荒邱耳

趙州城南平棘縣境通津有大石橋曰安濟長虹高跨

通衢上分作三道下爲環洞兩塊復各爲兩洞制作精
偉闌楯刻蹲獅細巧奇絕華表柱上宋臣使金者刻題
甚多不能盡讀有刻曰連鵬舉使大金至絕域實居首
選宣和八年八月壬子題橋上片石有驢足跡四所世
傳神仙張果老之跡或云當時匠者之戲匠者曰李春
隋時人也張果老列仙傳云果眞定蒲吾人隱封龍山
唐高宗召不起明皇迎入禁中賜號通元先生後不知
所終今眞定平山縣東十三里有蒲吾古城卽果老居
也

河朔訪古記

卷上

九

趙州城西門外平棘縣境有永通橋俗謂之小石橋方
之南橋差小而石工之制華麗尤精清洌二水合流橋
下此則金明昌間趙人哀錢而建也建橋碑文中憲大
夫致仕王革撰橋左復有小碣刻橋之圖金儒題詠併
刻于下

李昉書院

吟臺附

元氏縣封龍山龍首峯下有宋丞相李

昉讀書堂及吟臺皆在焉李公書堂本三所東溪爲浮
屠所占西溪蕪沒不可考今建書院者卽中溪也吟臺
在東北隅疊石爲之高三丈餘宋碑一通尙在逮國朝

至元三年李文正公治自翰林學士辭歸隱山中因其故基以築大成殿講堂齋舍招延學者王文忠公磐爲撰書院記李文正公字仁卿自號敬齋云金進士樂城人也有文集行世王文忠公字文炳號鹿菴廣平人亦云金進士入國朝爲翰林承旨年九十二以壽終

徐童樹在元氏縣封龍山修真觀四周多徐童樹樹類梧桐香氣時襲人其子可以染碧移植他所則輒死俗呼爲徐童華世謂北嶽徐眞君登仙于此記云駱元素遇一老人得藥十粒且告曰服此則不饑吾本姓徐氏

河朔訪古記

卷上

十

字元英新受長桑君牒爲北嶽長史言旣化童子乘白雲而去因以名云

中山府學講堂前有雪浪石承以丈八芙蓉石盆盆口鐫蘇文忠公雪浪石銘其石紋作波濤痕復有若卧牛立鳳之狀者昔蘇公守定日甚愛此石構小室置之榜曰雪浪齋云西廡下一碑圖石之形并刻其銘于右學中又有唐王維畫竹碑二通一黑一白世謂陰陽竹也玉華宮在眞定路城中衙城之北潭園之東是爲睿宗仁聖景襄皇帝之神御殿奉安御容者也外爲紅綽楔

垣牆四周槐柳森列重門棨戟廣殿修廡金碧輝映宏壯華麗擬于宮掖制命羽流崇奉香鐙置衛士以守門闔歲時月日中書以故事奏聞命集賢院臣代祀函香致醴遣太常雅樂率燕南憲臣真定守臣具朝服備牲牢行三獻之禮延祐間御史元永貞上疏略曰聖朝建宗廟崇孝享可謂至矣而睿宗神御別在玉華宮竊惟功德莫如太祖世祖不聞有原廟世祖神御奉安大聖壽萬安寺歲時以家人禮祭供不用太常雅樂今玉華宮又非龍興降誕之地伏望朝廷照依京師諸寺影堂

河朔訪古記

卷上

十一

例止命有司祭供罷太常樂斯得典禮之正矣疏上不報元統乙亥監禮官薩都拉天錫有詩詠其事詩曰大禘天香出內宮孝思與世總無窮百年禮樂行三獻一派簫韶起半空使者領班雲氣裏女仙搖佩月明中小臣監禮陪清列兩袖葵花映燭紅天錫進士時爲燕南廉訪司照磨云

開元寺在真定路城中鼓角門天祿坊西此卽張五村故地也寺內三門石柱刻曰大歷十二年藁城主簿李宿撰解惠寺三門樓贊云後魏興和二年建寺曰淨觀

至隋開皇十一年改曰解惠後復改開元寺寺有千石鐘聲聞數百里今爲官府昏曉之警鐘樓栱間有趙閒閒所遺墨跡正殿皆石欄環繞鐫刻花木禽獸人物極爲工緻纖巧寺復有轉藏經碑乃梁王承規集王右軍書也妙絕當世復有封居賦小篆千文碑在寺中

臨濟寺在眞定府城中定遠門東街飛雲樓之東其三門下有唐吳道子所畫布袋和尚像及搖鈴普化眞讚東坡墨竹綠筠軒詩等石刻極爲精妙寺乃臨濟祖庭其靈塔則金世宗所建也昔臨濟和尚結茅于此嘗與

河朔訪古記

卷上

十二

木塔河陽二師圍爐而坐木塔曰搖鈴普化果是凡是聖普化適至揭簾西入汝謂我是凡是聖臨濟大喝一聲普化作偈曰河陽新婦子木塔老婆禪臨濟小厮兒倒具一雙眼世傳本寺趙王鎔所賜墨君和故宅也趙州城中東門內有栢林院世呼爲趙州古佛道場蓋唐末僧趙州和尚修行之所舊在城外後城旣展而在東門內矣院西丁字街有石浮圖俗曰大石塔高可四五丈制作極工上刻古薤葉篆亦妙宋景祐五年西廂人所建也

中山府城中天甯寺後有小寺世傳慕容垂之後宮也其妃以誣被殺寃血濺砌石石白血殷漬而不滅每雨過其色愈鮮余嘗考北史垂妃無它被殺者惟段氏諫垂廢太子寶垂不聽寶深銜之及卽位令自殺疑此卽段氏之血也

欒武子廟欒城縣西四里彪豕村高邱一所曰欒武臺臺有廟曰欒武祠此卽欒伯書之廟也書諡曰武故云廟西南有一冢曰彪豕俗傳武子獵于此射一彪死葬于此焉

河朔訪古記

卷上

十三

中山府文廟西宋丞相魏忠獻王韓公琦祠堂存焉琦爲帥有惠政州人爲立祠祠下有碑一通其略曰仁宗朝出知定州時州兵不治將爲亂及至卽用兵律裁之察其橫不知教者斬之有死于戰敵者賞其家其孤兒使繼衣廩迺攷古兵法列方圓銳三陣親教習之由是定兵強勁可用號稱雄鎮聲振契丹云

眞定路城中開元寺後繡女局內唐清河郡王李寶臣紀功碑一通其碑極高大永泰二年立類要云李寶臣紀功二碑一在眞定府治東三十步卽此碑也一在府

西一十步大歷三年立今在居民房屋土底常有人掘見云

真定路城中開元寺後繡女局內復有鉅碑埋土中止露碑首長及丈五題曰王武俊碑貞元五年立文字皆不可考類要云王武俊碑去真定府治東門二十步卽此碑也

真定路南關陽和門外史丞相遺愛碑一通螭首龜趺高四十尺冠以華屋壯麗崇峻其文則郡教授吳時起撰也碑略曰公姓史氏名天澤大都永清人國初嗣兄

河朔訪古記

卷上

十四

天倪爵爲河北兵馬都元帥尋除真定等處五路萬戶又擢經略宣撫使世祖皇帝卽位中統二年超拜右丞相至元元年進光祿大夫三年進輔國上將軍爲樞密副使四年復爲左丞相六年以榮祿大夫爲平章政事八年加開府儀同三司平章軍國重事中書左丞相公出入將相五十年柱石四朝儀表百辟古之社稷之臣也其保障河北戰三峰山掙金擣宋皆建奇功嘗同巴延淮安忠武王統大軍至鄂渚以疴召還明年薨于位卽十二年二月七日也享年七十二贈太尉諡忠武葬

眞定縣太保莊墓碑翰林學士圖克坦公履撰神道碑
則翰林承旨王磐撰皆敕賜文也延祐六年加贈推忠
贊治同德佐運功臣太師開府儀同三司上柱國鎮陽
王初公之治眞定也披荆棘驅狐狸開城郭立官府以
招人民成天下之劇郡四方之都會武仙之亂公兄元
帥天倪遇害主將欲盡誅郡人以雪其恨公恐失脅從
罔治之義忍忿含垢亟諫數四乃得全活壬辰招降老
幼十萬餘口將護北渡使其自便處所或使歸鄉里一
無所問其德可勝言哉公甲第今在子城西黑軍營北

第中有靜治堂青樾樓景光亭江漢堂云十二月早渡
滹沱河抵陽和門外日卓午矣飯于旅舍遂至南關下
馬讀其碑而去

眞定路府學尊經閣下有劉法墨史圖石刻及楊祕監
邦基畫及金諸賢詩極精妙也舊在墨史堂今龕閣壁
云

唐恆州刺史陶雲碑在眞定路府治廡下有唐恆州刺
史陶雲碑一通字爲行草書筆勢遒勁而不著書者姓
名其文則唐申州錄事張義感所撰其略曰雲字大舉

河南伊闕人高宗時爲恆州刺史其碑則永淳三年立也昔宋歐陽文忠公爲河北轉運使至真定見碑仆府門外半埋土中命工掘出立于廡下云

三公神廟碑

白石神君無極山二漢碑附

三公神廟在元氏縣西北

三十里封龍山下其廟兩兩相對若泰階六符之狀蓋三台近于軒轅故廟于此山今榜曰天台三公之廟廟有漢封龍山頌碑一通漢三公山碑一通縣西故城西門外八都神壇亦有三公山碑一通漢光和四年常山相馮巡所立壇側又有唐三公山碑一通八都者總望

河朔訪古記

卷上

十六

八山而祭於此明帝永平中幸此詔復租稅六年勞來縣吏下及走卒皆蒙恩賜其後章帝北巡又幸元氏祀光武于縣堂祀明帝于始生堂皆奏樂焉白石神君碑無極山碑二漢刻皆在封龍山下

唐盧舍那珉像碑

鐵塔附

元氏縣城中開元寺有唐蔡有

鄰隸書盧舍那珉像一通歐陽文忠公曰唐世能名八分者四家韓擇木史維則世傳頗多而李潮及有鄰特爲難得慶歷中昭文韓公始得此本有鄰小字尤佳若石經藏讚崔潭龜詩與三代鼎彝何異也又云其碑石

刻在中山府城中蓋傳聞之誤耳開元寺內西北院中有生鐵塔高四五丈其制亦機巧

定武蘭亭石刻舊在中山府庫中爲天下名本今埋沒不知所在昔唐太宗詔供奉臨蘭亭惟此本乃率更令歐陽詢所搨也上命刻石畱禁中以他本賜外臣一時貴尙摹搨惟禁中石本獨完善至五代石敬瑭棄中國而契丹耶律德光自中原輦寶貨圖書還北至殺虎林而死永康立其國交兵遂棄石而歸慶曆中李學究者得之韓忠獻壻始以墨本出示韓公索其石觀李遂瘞

地中李死其子出石始售于人每本必千錢由是好事稍稍得之後李負官緡無償時宋景文公祁守定武以公帑金代李輸之取石匣藏于庫非故舊不得口熙甯閒辭師正守是邦求者沓至辭惡其摹打之聲乃刻別本于外以遺求者然此郡已有二刻真贋矣其子紹彭摹他石以易元刻暗以自別遂於古刻湍流帶右天五字各刻損二筆爲記或謂古蹟仰字如針眼殊字如蟹爪列字如丁形又云字微帶肉此爲唐刻本也大觀中徽宗詔取此石于辭氏家其子嗣昌進納御府上命龔

置宣和殿靖康金人陷汴京其石不知所存云金以紅毯輦歸金東南諸刻無能彷彿者天台桑澤鄉世昌編蘭亭博議一書甚詳

趙州城東北三十里平棘縣境上古宋子城城中有漢耿球碑一通作漢隸蓋耿純宋子人也城西有耿鄉漢光武封純爲侯國世謂之宜安城至今民多姓耿皆純之後也宋子故城卽秦高漸離匿作宋子而歌之所也按衛恒四體書勢曰鉅鹿宋子城耿球碑師宜官書袁術立球純之後云

河朔訪古記

卷上

十八

徐整碑在栢鄉縣西南七十里栢鄉故城之西門內漢栢人令徐君碑一通君名整桓帝時爲栢人令有惠政民懷之爲立碑此卽高祖動心不宿之地也

栢鄉縣城中通衢居民檐下栢鄉尉蘭君碑一通君名儼字望之唐會昌閒尉栢鄉有遺愛民伐石立碑潞州進士張環製文將樹碑時皇叔觀察使完顏從郁適朝京還因題詩一章于碑後曰卿材皆願識將軍事簡將軍少出巡白酒不沽誰犯禁黃雞無禍得司晨問耆撫幼非干舉止社停巫豈慢神數尺去思碑上語後官知

勸可書紳鄉人併刻其詩于碑後

吉日癸巳石刻四字周穆王所刻也昔在趙州贊皇縣城南十三里壇山崖石之上穆天子傳云穆天子登贊皇山以望臨城置壇此山因以名焉癸巳誌其日也又有四望山者謂穆王登山望祭四方者傳中但云登山而不言石刻然字畫亦奇怪若杖畫狀土人謂壇山爲馬鐙山以其已字之形類鐙也宋尙書廣平宋祁以皇祐四年秋自毫移鎮鎮陽道出趙州命人于壇山石壁模得此字時趙之守將武臣也遽命鑿山壁輦其字歸

河朔訪古記

卷上

十九

趙龕之廳壁聞者莫不嘆惋嘉祐己亥移置高邑縣廳壁元至元二十三年乙酉復移龕贊皇廟學之壁云藁城縣城中文廟內有漢藁長蔡湛碑一通光和四年立并碑陰全廬陵歐陽文忠曰天章閣待制楊旼嘗謂余言漢時隸書在者此最爲佳旼自言平生學此字也藁城縣九門城中有隋九門令鉗耳府君碑不載書撰名字碑首題云大隋恆山郡九門令鉗耳清德之頌君名徹華陰朝邑人本周王子晉之後避地西戎世爲君長因以地爲姓曾祖靜魏馮翊太守祖朗成集二州刺

史父康周荆安甯鄧四州總管別駕龍門二郡守字畫
遒勁非歐虞不能及也

九門城中有隋李康城清德頌碑一通不著書撰名氏
文爲聲偶而字畫奇古可愛康隴西狄道人也碑首題
曰大隋冠軍將軍大中都督恆州九門縣令隴西李君
清德之頌字多訛闕其後曰十一年歲在辛亥大將軍
在酉二月癸丑朔十二日甲子建年上二字磨滅不可
識按隋開皇十一年歲在辛亥其二字乃開皇也大將
軍在酉之說出於陰陽家前史不載而見此併記之

河朔訪古記

卷上

二十

藁城縣九門城西浮圖碑一通題云九門縣合鄉城人
等爲國建浮圖之碑唐應詔四科舉董行文撰文清河
傅節得書唐高宗上元三年歲在丙子建浮圖在智短
寺寺今亦廢久矣

馮樂陵在新樂縣東北二十里卽漢馮昭儀之墓也昔
昭儀隨其子中山孝王興就國王爲母築宮于樂里以
居之樂里卽今新樂城也昭儀在元帝之時有當熊之
功成帝優異之賜御服鼓吹鹵簿名其居曰樂里旣終
敕葬樂里東北因名其墓曰馮樂陵云十二月

原本缺
二字

早自新樂縣起午前至馮樂陵午飯遂至荒陵眺望而
去午後雪復大作

漢中山王陵安喜縣東唐河西北有二墳卽漢中山哀
王憲王之陵世訛爲二女陵非也哀王乃孝王之孫康
王之子寰宇記曰滹水又名唐河自唐縣界流入東注
京邱北對君子岸岸上有哀王憲王二陵又聞中山懷
王順王夷王數陵在安喜縣境內今皆不可考矣
李左車墓趙州城西七里清水之曲有高冢一所世傳
爲李左車之墓冢上今爲佛地中有一井可汲餘無考
河朔訪古記
卷上
二十一
者冢上但有口魏景明二年所立兗州刺史李使君碑
一通而已

樂城縣西陲有村曰陳居陳餘墓在焉此餘遊趙日所
居死歸葬此

樂城縣城東石欄橋東二里有冢極高爲漢蒲關侯柴
武之墓也隋開皇間武有遠孫爲浮屠氏曰英師并葬
于冢側今臺冢亦漢制也冢旁有臺頭寺俗訛爲柴世
宗墓非也近冢曰柴村卽武族之所居也

眞定縣南十里古常山城下治河之濱荒冢隱然是爲

漢膠東侯賈復之墓昔濬沿河發古冢得骸骨異常身
環鐵甲一戟在旁尋復得其墓志始知爲賈復之墓也
太守馬公斂以衣衾更瘞之後燕南憲掾孫茂先見其
事後三十年告于郡知事王德禎因礮石請監察御史
楊君俊民爲文刻諸石名曰懷賢之碑以表其墓其略
曰侯南陽人光武拜執金吾冠軍侯建武間封膠東侯
食六縣後罷將軍以列侯就第卒諡剛正按後漢書作
剛無正字
侯嘗破五校于真定創甚光武念之約爲婚姻卒後哀
其成績詔葬于此或史之所逸也又述宋洪适之言辨

河朔訪古記

卷上

二十二

論埋銘之原以爲自漢明帝時都尉路君墓門始至爲
詳博王君字祐之保定人好古篤實君子以余爲忘年
友也楊君字士杰郡人舉進士敷歷館閣今爲國子司
業亦余之故人也

郎氏墓碑在新樂縣東南十五里曲郡村有郎氏墓墓
林中有郎茂郎穎二碑皆李百藥撰宋才書字畫甚偉
碑云茂從煬帝幸江都而卒穎事唐爲大理卿隋唐之
時屢更定律令蓋法律士也穎之碑陰題名云柱國府
僚佐三十二人常山公府國官一百七人合一百三十

九人爲一卷柱國府長史司馬掾屬各一人諮議記室司倉司功司戶司兵司鎧司法司田司士參軍事各一人又有參軍事五人行參軍十人典籤三人常山國官國令大農各一人常侍侍郎國尉各二人典尉六人舍人四人城局廟長學官各一人食官廩牧各四人典府長一人典府丞二人親事七十五人穎以貞觀四年卒此蓋唐制也

眞定之西關外社壇西北隅城濠之外眞定縣境上也
有褚先生墓墓下小碣一通其略曰先生褚氏諱承亮

河朔訪古記

卷上

二十三

字茂先宋宣和二年擢第調易州戶曹會金皇子郎君破眞定拘境內舊進士七十三人赴安國寺試策策曰以上皇不道少主失信舉人希旨極口詆毀先生離席揖主文劉侍中曰君父之過豈臣子所當言耶長揖而出場屋劉爲之動容比揭榜先生被黜餘悉放第狀元許必輩自號七十二賢榜時人謂先生曰有德先生朝廷重其名命知藁城漫一應之尋解印去年七十終弟子周伯祿等百餘人因私謚曰元貞先生云十二月早謁拜墓下

眞定縣北十五里大安鄉曹家疇道左墓碑題曰元故
僉浙東海左道肅政廉訪司事甄君之墓墓前一碑中
奉大夫陝西諸道行御史臺侍御史趙郡蘇天爵撰文
國子司業王理書翰林直學士謝端篆碑略曰君諱世
良字賢卿世爲眞定人年四十餘始遊江南試吏四明
擢浙東西憲掾進南臺察院受知文皇帝尋貢中臺除
廣西廉訪知事遷帥府都事際遇今上于潛邸比紹大
統召君入朝臺臣奏爲山南經歷上不允改通政都事
尋拜監察御史出僉浙東憲至元元年九月十八日卒

河朔訪古記

卷上

二十四

於金華官舍年六十八君任廣西調護聖躬夙夜無懈
嘗書賢卿二字賜之及遷浙東又賜緡錢五千貫其恩
眷類此子二人曰英曰蒙云蓋君之在四明也與先君
子最厚善每過余家喜余誦讀語人曰此子可教也今
子自海上歸南陽將上京師道出鎮陽竊幸拜君之墓
嗚呼二十年之間見君之窮達生死而予栖遲草萊年
益邁而學益荒負君知人之鑒矣

眞定縣北新城鎮南二里許墓林蒼蔚羊虎翁仲皆白
石鐫鑿極爲偉壯是爲嶺北行中書省郎中蘇君之墓

隧前一碑迺蘇氏先塋之記奎章閣侍書學士蜀郡虞公集撰翰林承旨吳興趙文敏公孟頫書丹爲二絕之筆也君墓碑亦虞公撰其略曰君名志道字子甯以吏起家爲丞相掾三命爲樞密經歷延祐三年歲丙辰關中有變遂及和林人大震恐並皆奔散會天大雪深丈餘車廬人畜盡壓沒民皆枕藉相食道無行人朝廷超拜君爲中憲大夫嶺北等處行中書省左右司郎中君請厚價募民粟至和林以賑饑民遂得全活明年行至京師卒其子天爵奉柩歸葬于此天爵字伯修以文章

河朔訪古記

卷上

二十五

起家敷歷臺閣爲時名人今以國子祭酒選爲京畿奉使宣撫十二月大雪畱新城不得發至墓稍晴遂同李亨散步至墓上讀虞公所撰碑過墳菴又讀費著周伯琦等燕南考試回題壁守墓者邀余二人啜茶且言昔畊墓旁得古碑之蓋一段其制若今擣練方石字皆漫滅不可讀蘇公定爲碑蓋也蓋古人埋銘必以石覆其碑恐土蝕其字畫故碑蓋則大篆其題目今之碑文曰篆蓋卽其遺意也

藁城縣東南二十里倪家莊側有唐倪若水墓莊多姓

倪氏皆若水子孫也若水字子泉擢進士開元初爲中書舍人尙書右丞出爲汴州刺史政清靜興州縣學風化大行未幾入爲戶部侍郎復右丞卒

藁城縣二十里新興村溥南王先生墓在焉先生諱若虛字從之金進士及第仕至翰林學士國初遁此自號溥南遺老篤志經學尤長于經義南北師尊之以爲法後登太山端坐而逝歸葬于此有慵軒集及經史諸書辨疑行世墓前碑則元遺山所撰也有司今立祠縣學以祀云